

## IL COMITÂT PE AUTONOMIE E PAL RILANÇ DAL FRIÛL AL À INCUINTRÂT TONDO TE SEDE UDINESE DE REGJON

# *Viertidure, ma no masse*

«La leç sul furlan no si tocje fin che la Consulte no si esprim». Posizion confermade ancje di Molinaro. Ma, al à zontât Tondo, «dopo si pues ancje cambiâle»

**A**L DIFINDARÀ SÌ, denant de Cort costituzionâl, la leç di tutele de lenghe furlane, fate buine dal Consei regionâl tal Dicembar stât, salf po cjapâle in man par viodi ce fâ di jê. Il president de Regjon, Renzo Tondo, al conferme di jessi om sçlet. Se une robe no lu convinç, nol conte bufulis par imbonîsi i citadins. Il «silenzio-assenso» no i à mai plasût, tant che l'ûs veicolâr de lenghe furlane a scuele. Parcè dineâlu? Ai furlaniscj dal Comitât pe autonomie e pal rilanç dal Friûl, vuidâts dal president Gianfranco D'Aronco, che a àn incuintrât Tondo miercus ai 25 di Jugn te sede udinese de Regjon, il president lu à marcât, cuntune gnove: «La leç no si tocje fin che la Consulte no si esprim in mert». Posizion confermade ancje dal assessôr regionâl ae Culture, Roberto Molinaro. Ma, al à zontât Tondo: «Une volte difindude, si pues ancje cambiâle».

Tondo al slungje la man ai furlaniscj, ma su cualchi teme e reste, duncje, diversitât di viodudis. Il president, di fat, nol crôt che la cuestion de lenghe furlane e sedi decisive par

fâ valê lis resons de specialitât – miôr sburtâ lis tipicitâts enogastronomiche, al à dit –, mentri il Comitât al pense che par otignî un tratament economic a pâr di regjons tant che Trentin Sudtirolo e Val d'Aoste, si à di pontâ su la cjarte dal plurilinguism, dal ricognossiment dai furlans tant che minorance linguistiche tutelade de leç taliane 482/99 e de Union europeane.

Positivis lis assicurazions di Tondo in mert ae specialitât de Regjon: «Le difindarai, ancje se cumò e je un "handicap" tai confronts dal Stât». Segnâi positîfs a son rivâts ancje a rivuart aes trasmissions par furlan su la Rai. Il Comitât al à domandât di dâ continuitât al progjet radiofonic sperimentâl, che al larà indenant fin ai 14 di Otubar. «Mi met a disposizion», al à dit il president de Regjon, che al à prometût di intervignî sul Guvier.

Cul incuintri cun Tondo e cul retôr de Universitât dal Friûl, Cristiana Compagno, vinars ai 27 di Jugn, si sie-re cussì la schirie di confronts cun sogjets des istituzions e de Glesie Udinese, volûts dal Comitât par domandâ cun fuarce un gnûf guvier dal teritori,



Te foto:  
zovins  
furlaniscj.

sostegn ae valorizazion des identitâts e de lenghe furlane te scuele e tal servizi public radio televisîf, de specialitât de Regjon, dai progjets di svilup economic e sociâl dal Friûl midiant de Comunitât des Provinciis furlanis. «Un organisim par frontâ insiemit dai problemis, cence jessi une sovrastruttura», a àn ricuardât chei dal Comitât.

**ERIKA ADAMI**